

**Dr Noor Hisham pengerusi mesyuarat jawatankuasa tertinggi dalam WHO**  
**Astro Awani**  
**14 April 2023**  
**Bernama**

KUALA LUMPUR: "Ini pengalaman seumur hidup mempengerusikan mesyuarat jawatankuasa tertinggi dalam WHO," kata Ketua Pengarah Kesihatan Tan Sri Dr Noor Hisham Abdullah menerusi pesanan WhatsApp kepada Bernama hari ini.

Dr Noor Hisham yang akan bersara daripada perkhidmatan awam dalam tempoh seminggu, berada di Geneva bagi mempengerusikan mesyuarat kedua Jawatankuasa Tetap Pencegahan, Kesiapsiagaan dan Tindak Balas Kecemasan Kesihatan (SCHEPPR) Pertubuhan Kesihatan Sedunia (WHO) yang diadakan dua hari bermula semalam.

Beliau dilantik sebagai Pengerusi pertama jawatankuasa itu bagi tempoh antara satu hingga dua tahun pada mesyuarat pertamanya, yang diadakan secara maya, pada 12 Dis tahun lepas.

Isnin lalu, media melaporkan Dr Noor Hisham akan bersara sebagai Ketua Pengarah Kesihatan pada 21 April selepas 35 tahun berkhidmat dalam kerajaan.

Dalam ucapan pada mesyuarat itu, Dr Noor Hisham menekankan peranan utama SCHEPPR adalah untuk menyokong dan mengukuhkan WHO, Peraturan Kesihatan Antarabangsa (IHR) dan Badan Perundingan Antara Kerajaan (INB).

Beliau berkata taklimat pengenalan oleh Jawatankuasa Pengawasan dan Penasihat Bebas (IOAC), Lembaga Pemantauan Kesiapsiagaan Global (GPMB) dan Program Kecemasan Kesihatan WHO (WHE) turut diberikan kepada ahli Jawatankuasa Tetap (SC) berorientasikan kerja mereka.

"Seperti yang dinyatakan sebelum ini, jawatankuasa tetap ini tidak akan bertindak sebagai pendua, sebaliknya melengkapkan tugas baik yang dilakukan oleh IOAC

dan GPMB. Adalah penting bagi SC untuk memberi keutamaan kepada kerja yang digariskan dalam TOR dan kekal fokus dalam perbincangan dan pertimbangannya," kata beliau.

Lembaga Eksekutif 34 anggota WHO, semasa mesyuarat tahunannya pada Mei tahun lepas, bersetuju membentuk SCHEPPR untuk membantu mempercepatkan tindak balasnya terhadap kecemasan kesihatan global seperti COVID-19.

Jawatankuasa Tetap hendaklah bermesyuarat sekurang-kurangnya dua kali setahun untuk menjalankan kerja tetapnya dan boleh memutuskan untuk mengadakan mesyuarat luar biasa untuk menangani perkara-perkara yang mendesak.

-- BERNAMA

**© 2023 Astro AWANI Network Sdn. Bhd. 200001032668(535275-D) All Rights Reserved.**

Source: <https://www.astroawani.com/berita-malaysia/dr-noor-hisham-pengerusi-mesyuarat-jawatankuasa-tertinggi-dalam-who-415430>